



TEKS UCAPAN
YBRS.TUAN HAJI CHEREMI BIN HAJI TARMAN S.I.S., A.I.S., P.P.T., P.M.C.
PEMANGKU YANG DIPERTUA
MAJLIS PERBANDARAN SELAYANG

DI
MESYUARAT MAJLIS MPS BIL. 5/2021

28 MEI 2021, JUMAAT

09:00 PAGI SECARA DALAM TALIAN

Assalamualaikum wbkt & selamat pagi diucapkan

Yang Amat Dihormati Tan Sri Dato' Paduka Raja Dato' Hj Wan Mahmood Pa' Wan Teh

Orang Kaya Maha Bijaya, Orang Besar Daerah Gombak

Yang Dihormati Ahli-Ahli Majlis,

Yang Berusaha Tuan Haji Azhar Bin Samsuri

Penolong Setiausaha Majlis Perbandaran Selayang

Para pengarah jabatan,

Pihak media, tuan-tuan dan puan-puan sekalian

1. Bersyukur kita ke hadrat Allah SWT yang telah melimpahkan rahmat dan hidayahnya untuk kita mengadakan Mesyuarat Majlis MPS **Bil.5/2021 bagi bulan Mei** pada pagi yang berbahagia ini.
2. Pertamanya, sebelum saya meneruskan ucapan pada pagi ini, saya ingin memaklumkan bahawa saya akan memangku jawatan sebagai Yang Dipertua MPS sehingga YDP baru akan dilantik. Saya mengharapkan kerjasama dan sokongan daripada tuan puan sepanjang saya memangku jawatan ini.

PEMATUHAN KEPADA ARAHAN PELAKSANAAN PKP 3.0 DIPERKETATKAN

3. Seperti semua sedia maklum, tempoh Perintah Kawalan Pergerakan (PKP) 3.0 Diperketatkan telah dilaksanakan pada 25 Mei yang lalu sehingga 7 Jun 2021. Oleh itu, semua aktiviti bersemuka seperti mesyuarat akan dilaksanakan secara dalam talian. Jadi, saya berharap segala perkongsian bahan mesyuarat, agenda penting dan perkongsian idea dapat dilaksanakan secara lancar walaupun tanpa kehadiran Ahli-Ahli Majlis secara fizikal di sini.

4. Selaras dengan pelaksanaan PKP 3.0 Diperketatkan, saya ingin memaklumkan bahawa kehadiran pegawai dan kakitangan yang bertugas di pejabat adalah pada tahap 20% dan 80% dikehendaki Bekerja Dari Rumah (BDR) mengikut jadual penggiliran yang ditetapkan oleh Pengarah Jabatan masing-masing berdasarkan arahan daripada Setiausaha Kerajaan Negeri Selangor dan Majlis Keselamatan Negara (MKN). Untuk makluman semua, perkhidmatan MPS juga telah disesuaikan di mana tempoh perkhidmatan melibatkan Ibu Pejabat MPS, kaunter bayaran Ibu Pejabat dan kaunter pandu lalu akan disingkatkan kepada 8.30 pagi sehingga 12.00 tengah hari pada hari Isnin hingga Jumaat. Untuk kaunter Pejabat Cawangan MPS pula akan ditutup sepanjang tempoh PKP 3.0 sebagai salah satu langkah bagi mencegah penularan wabak Covid-19.

5. Ingin saya ingatkan di sini, segala urusan di kaunter perkhidmatan MPS hendaklah dibuat melalui temujanji terlebih dahulu. Selain itu juga, orang ramai yang ingin berurusan dengan MPS perlu memaparkan status pelawat melalui aplikasi MySejahtera manakala warga emas yang berumur 60 tahun dan kanak-kanak berumur 12 tahun ke bawah tidak dibenarkan untuk memasuki premis MPS. Walaupun situasi ini kelihatan memberi sedikit kesulitan kepada para pelanggan, saya berharap semua dapat bersabar demi keselamatan kita semua.

6. Dan sebagai alternatif, MPS menggalakkan orang ramai untuk menggunakan perkhidmatan dalam talian bagi melakukan sebarang transaksi pembayaran dan permohonan bagi mengelakkan risiko penularan wabak Covid-19. Antara perkhidmatan dalam talian yang ditawarkan ialah seperti:

- E-Aduan – **Melaporkan aduan/ menyemak status aduan**
- E-Lesen - **Permohonan lesen baharu secara dalam talian**
- Sistem Tender Selangor - **Pembelian dokumen tender dan sebut harga**
- OSC Online 3.0 Plus - **Permohonan cadangan pemajuan melibatkan kebenaran merancang/ plan bangunan/ plan kejuruteraan/ plan landskap**
- MyMPS - **Membuat semakan dan pembayaran bil cukai taksiran**
- E- Dewan- **Membuat tempahan dewan MPS secara dalam talian**
- Semakan penyata lesen anjing- **Semakan maklumat penyata dan maklumat anjing yang telah didaftarkan di MPS.**

7. Walaubagaimanapun, MPS akan terus komited memberikan perkhidmatan terbaik meskipun dalam tempoh PKP 3.0 Diperketatkan ini, kakitangan diarahkan untuk bekerja secara penggiliran dan bekerja dari rumah (BDR).

PRESTASI SEMASA KUTIPAN CUKAI TAKSIRAN

8. Untuk makluman, sehingga 30 April 2021, MPS berjaya mengutip cukai taksiran semasa 2021 sebanyak RM49.57 juta (91.79%) daripada RM54 juta.
9. Untuk kutipan tunggakan cukai taksiran pula, sebanyak RM4.67 juta (57.29%) berjaya dikutip daripada jumlah tunggakan keseluruhan sebanyak RM8.15 juta.
10. MPS telah mengeluarkan waran tahanan bagi pemilik yang mempunyai tunggakan RM 200.00 ke atas bermula 16 April 2021. Sebanyak 29,641 keping waran telah dikeluarkan dan 3,646 keping waran telah dihantar sehingga 30 April 2021.
11. Bagi pemilik / penduduk yang masih gagal menjelaskan tunggakan cukai taksiran selepas 7 hari waran diserahkan, MPS akan melaksanakan tindakan sitaan apa jua harta alih di dalam premis tersebut dan operasi ini akan dijalankan pada setiap minggu.
12. Orang ramai adalah diingatkan supaya menjelaskan tunggakan cukai taksiran bagi mengelakkan tindakan sitaan dan lelongan diambil ke atas harta alih dan premis masing-masing

13. Kepada pemilik yang ingin menjelaskan tunggakan cukai taksiran, pemilik layak diberi pertimbangan pengurangan waran tahanan bagi bayaran secara penuh atau ansuran. Maklumat mengenai kelayakan pengurangan boleh diperolehi di kaunter bayaran cukai taksiran MPS.

PROGRAM PUBLISITI DAN PENDENGARAN AWAM BAGI DRAFT RANCANGAN TEMPATAN MPS (DRTMPS) 2030.

14. Pada hari Isnin ini, 31 Mei 2021, adalah peluang terakhir untuk orang ramai bagi mengemukakan maklum balas, pandangan, cadangan dan bantahan terhadap Draf Rancangan Tempatan MPS2030 (Penggantian).
15. Jadi, saya mohon penglibatan daripada semua pihak untuk tiga hari terakhir ini untuk mengemukakan pandangan, cadangan atau bantahan bagi menambahbaik pelan ini sebelum diwartakan. Untuk makluman, sehingga hari ini, MPS telah menerima sebanyak 56 bantahan terhadap cadangan pembangunan yang telah disediakan dalam DRTMPS2030 (Penggantian).

KEMPEN PERMOHONAN DAN PEMBAHARUAN LESEN PEMILIKAN ANJING MAJLIS PERBANDARAN SELAYANG

16. MPS juga akan mengadakan Kempen Permohonan dan Pembaharuan Lesen Pemilikan Anjing kepada semua pemilik anjing di kawasan pentadbiran Selayang bermula 1 Jun sehingga 31 Disember 2021. Kempen ini bertujuan untuk menggalakkan semua pemilik anjing berdaftar dan berlesen dengan MPS serta mematuhi syarat dan peraturan yang ditetapkan.

17. Justeru, saya berharap Ahli-Ahli Majlis dapat memaklumkan kepada masyarakat setempat yang memiliki anjing untuk membuat permohonan dan pembaharuan lesen anjing di MPS dan 500 orang pemohon terawal akan mendapat cenderahati berupa bekas makanan dan minuman anjing. Untuk maklumat lanjut dan syarat permohonan, sila layari www.mps.gov.my atau hubungi Unit Aduan Anjing, Jabatan Pengurusan dan Sisa Pepejal MPS.

PEMAKLUMAN BANTUAN KHAS RM500 BUAT PENIAGA BAZAR RAMADAN 2021 SELANGOR DALAM KAWASAN (PKP)

18. Untuk makluman semua, Kerajaan Negeri Selangor akan menyalurkan bantuan RM500 kepada para peniaga bazar ramadan 2021 Negeri

Selangor yang tidak dapat beroperasi sepanjang PKP mulai 8 Mei 2021. Jadi, saya berharap Ahli-Ahli Majlis Kawasan dapat memaklumkan kepada semua para peniaga bazar di kawasan pentadbiran MPS untuk membuat permohonan mendapatkan bantuan ini melalui laman web www.selangorprihatin.com bermula 21 Mei sehingga 30 Jun 2021 atau sila hubungi talian Selangor Health Care (SelCare) bagi sebarang maklumat lanjut. MPS berharap dengan adanya sedikit bantuan khas ini dapat meringankan beban kewangan para peniaga yang tidak dapat menjalankan perniagaan akibat pelaksanaan PKP tempoh hari.

AMALAN PENJARAKAN SOSIAL

19. Memandangkan jumlah kes jangkitan Covid-19 kian meningkat setiap hari, ingin saya ingatkan kepada semua untuk sentiasa mengamalkan disiplin sendiri yang tinggi, elakkan tempat yang sesak, jaga penjarakan fizikal, bersihkan tangan pada setiap masa, mengamalkan kebersihan sendiri yang baik dan digalakkan untuk memakai pelitup muka berganda (double face mask) bagi mengurangkan risiko kepada pendedahan virus.

20. Saya berharap kita semua dapat menyokong usaha dan langkah-langkah yang telah diambil oleh kerajaan dan memerangi wabak Covid-19 ini dengan mematuhi arahan yang telah ditetapkan.

Sekian, Wabillahi Taufik Wal Hidayah Wassalamualaikum
Warahmatullahi Wabarakatuh